

四庫全書

史部

欽定四庫全書

史部  
宋史全文卷二十七上  
下

詳校官編修臣潘廷筠

編修臣裴謙履勛

總校官降調編修臣倉聖脉

校對官助教臣卜維吉

謄錄監生臣張同履

欽定四庫全書

宋史全文卷二十七上

宋孝宗七

辛丑淳熙八年春正月癸丑權給事中趙汝愚奏中書  
門下省錄黃陳源轉官差遣臣竊惟陳源係內侍而得  
參預一路軍政事體重大漸不可長臣嘗讀建炎三年  
詔書自崇寧以來內侍用事循習至今理宜痛革自今  
內侍不許與主管兵官交通假貸饋遺借役禁兵當是

時內侍與兵官交通借役禁兵且猶不可今乃假以一路總戎之任臣恐非太上所以防微杜漸之意也甲寅上宣諭曰陳源舊帶添差浙西副總管近奉太上皇帝聖旨為應奉有勞特轉兩官趙汝愚因論內侍不可干預軍事其言極當甚不易得丙辰又宣諭曰陳源可與在內宮觀免奉朝請密院更具應內侍見帶兵官者可並降指揮與在內宮觀永為定制

臣留正等曰齊寺人貂漏師于多魚左氏謹而志之風沙衛殿齊師殖綽郭晷曰子殿國師齊之辱也宦

者干預軍政自古忌之矣敗國喪師莫不由此蓋至唐世宮掖之變本朝夷狄之讐則又其權之尤熾而禍之尤甚者也壽皇嘉賞趙汝愚之奏至於再三即罷陳源軍職又詔內侍見帶兵官者並與在內宮觀永為定制其防微杜漸所以為後世慮者遠矣此繫國家安危治亂之大者臣故詳而著之

戊辰宰執進呈諸軍搗設錢數上曰此內外諸軍射射精熟人事也嚮來諸軍只習右手射近又教習左手射頗精各支搗設以示激勸 庚午知台州唐仲友言鰥寡孤獨老幼疾病之人乞依乾道九年例取撥常平義倉賑給上曰常平米令低價出糶若義倉米則本是

民間寄納在官以備水旱既遇荒歲自合還以與民況  
台州自有義倉米可令賑濟 乙亥起居郎兼太子左  
諭德李待問奏事上曰春間一雪可喜待問奏近官僚  
對皇太子賀雪語及此皇太子曰大率芝草珍異之物  
皆不足為瑞惟年穀豐民間安業乃國之上瑞上曰東  
宮見識高遠待問奏近者因講周禮太府一節論國家  
用度當與百姓同其豐歉皇太子曰人君但當以節儉  
為本此乃言外之意非人思慮所及者又嘗對宮僚稱

王佐天府之政云惟不畏強禦則可以立事不侮鰥寡則可以愛民為政要不出此兩事耳上曰學問過人如此誠社稷之福待問奏此皆自陛下家學中來上曰東宮亦自儉約宮中受用凡百技間無他嗜好又謙和慈祥朕常語之曰德性自己溫粹須是廣讀書濟之以英氣則為盡善上又曰恭者不侮人儉者不奪人恭儉者修身之本朕亦常以此為東宮言待問奏臣亦切聞陛下踐履此兩句上曰朕平日用之古人謂不以其所能

者病人不以人之所不能者愧人皆當踐履 二月庚辰進呈知福州梁克家乞宮祠上曰與復觀文殿學士趙雄等奏欲令再任上曰難云再任可降指揮依舊知福州 壬午宰執進呈未及展讀上喜見顏色宣諭云內侍賜北使宴自淮上回言麥正缺雨先得一雨後得三尺雪雄等奏陛下無一念不在斯民去歲雖早先事措置米價不增民無流殍上曰亦賴卿等處置精審雄等奏今雖米賤猶慮其無錢可糴欲行下去歲旱傷州



縣於義倉米內支給至三月終上曰正合朕意於是詔去歲江浙湖北淮西路郡縣間有旱傷去處已令多出椿積等米廣行賑糶今雖聞諸路米價低平其間鰥寡孤獨貧乏不能自存之人無錢收糶深所矜憫可令州縣鎮寨鄉村抄籍姓名將義倉米賑濟務要實惠及民如州縣奉行不虔仰本路漕臣及提舉常平官覺察以聞重寘典憲己亥進呈太府卿蘇峴擬除閩漕上曰師揆來乞此闕乃是師垂為淮東提舉壞官錢二十餘

萬緡兼聞其下尚有三弟他日皆作郡則近地州府都  
占了莫若以高爵厚祿使之就閑卿等更議之既而雄  
等奏陛下方務廣恩既難批出臣等日侍左右若作勘  
會亦涉商量須因人言乃可議此上曰如此則且令師  
揆依舊淮西運判却別以一缺與師垂使避其兄庶幾  
事體順乃除師垂閩漕三月己巳上御集英殿策進  
士有曰司寇園士古之刑也近世殺越人于貨徒流而  
已覆出為盜將何以懲園士之制今可議乎是日宰執

先赴奏事宣宗御試題聖諭云成周園士之法乃以處  
奸惡今配隸盜賊甚多欲舉行其法故以此發問觀其  
對如何 是月賜黃由等及第出身有差 詔應臨安  
府及諸路官私房儼不限貫百十分減三 閏三月辛  
巳詔諸路監司帥臣歲終各以所部郡守分三等治効  
顯著者為臧貪刻庸繆者為否無功無過者為平詳加  
考察具名來上內臧否各著事實如考察不公令御史  
臺彈劾夏四月癸丑宰執奏事畢上宣諭曰昨日臨安

取到諸縣繭亦薄已令宮中繰絲看矣既而樞密院從容論事因及今歲雨暘上曰今歲雨暘以時而繭蠶反薄大麥亦穗短宮中所養蠶亦如此殊不可曉適來已諭三省令王佐體訪求所以未至王淮等奏陛下愛民軫念及此天下之幸庚申奏事畢上曰雨恐妨麥已降香祈禱矣又曰曾問王佐蠶繭今年如何薄趙雄等奏佐方取繭繰看亦徧詢諸縣續具奏聞上曰聞今年民間養蠶太多葉既艱又食溫葉所以繭薄孟子謂五畝

之宅植之以桑勿失其時則可以衣帛矣誠哉是言也  
甲戌史浩等奏昨經筵讀三朝寶訓徹章臣等奏請  
繼續何書翌日詔真宗正說宜以進讀自是間日退朝  
必御崇政非休假未嘗暫止臣浩嘗讀正心篇論黃帝  
無為天下治上曰所謂無為者豈宴安無所事事之謂  
乎臣浩又讀剛斷篇讀漢武帝知郭解能使將軍為言  
其家不負上曰武帝如此可謂洞照事情臣浩又讀大  
中篇論為政之道本乎大中上曰勿渾渾而濁勿察察

而明即此理也臣等切窺聖意固不推見淵微固將耳  
受躬行追咸平景德之盛自昔人主臨御日久非內感  
聲色則外事畋遊其蔽則至於溺浮圖求神仙今陛下  
天縱聰明日躋睿智歲時甫浹篇帙再周帝王之汲汲  
孔子之皇皇不是過也伏乞宣付史館詔從之 是月  
詔經筵記注官侍立並以所聞退書其實 五月丙子  
上曰近日都下銷金鋪翠復行於市不必降指揮只諭  
王佐嚴加禁戢若有敗露京尹安能逃責耶朕以率耕

牛禁銅器及金翠等事刻之記事板每京尹初上輒示之 己卯進呈芮燁轉對言集議唯強有力者是從不若令各為議狀如論科舉則禮部秘書省國子監官皆預之類上曰如此則廢集議矣趙雄等奏燁所論乃漢所謂雜議也恐亦可從上曰今後遇事旋降指揮是月以讀真宗正說終篇賜宰執侍讀侍講說書修注官宴於秘書省 六月戊午戶部言去歲兩浙江東西湖北淮西旱傷共檢放上供米一百三十七萬九千餘石

隨苗經總頭子勘合等錢計二十六萬六千餘貫詔並與蠲放 庚申戶部言乞撥還去年旱傷無收經總等錢二十六萬餘貫上曰可盡與之趙雄等奏曰初謂錢數太多欲令戶部均認豈謂聖慈略無難色悉以予民臣等不勝歎仰 丙寅樞密院進呈昨得旨令密問淮西總領葉宏聞郭剛軍中刻剝軍人虛實據葉宏回報郭剛別無刻剝止是舊有軍須庫俵賣布搭息一事上曰卿等可諭都承旨傳旨宣諭郭剛令日下任罷併本



息蠲放免行追索仍令責問本人號曰老將如何猶有此等事卿等可更切責葉宏既職事是報發御前軍馬文字此等事如何不早以聞必待詢問然後方報此後應諸軍凡有刻剝等事須即以實奏知是月紹興府徽嚴州水命賑之知處州李士龍納租多取加耗詔降一官元數止一萬四千有奇斛面出剝二萬三千餘罰受納官趙汝楫追兩官勒停秋七月乙亥朔是月定上雨水限諸縣五日一申州州十日一申帥臣監

司類聚候有指揮即便聞奏 錄范質後 呂祖謙卒

祖謙自五年冬以著作郎兼權禮部郎官以疾奉祠至是終於家祖謙稟資特異聞道甚早其學本於累世家庭之所傳博諸四方師友之所講參貫融液無所偏滯與張栻朱熹更唱迭和其道復大彰明天下之士翕然歸之祖謙六世祖夷簡五世祖公著皆以勲德著聞四世祖希哲首從程頤遊復以儒學名世淵源所漸尤為深遠上嘗令祖謙編次文鑑一書稱其用意有補治道

平生著書至多皆以繼絕表微扶正息邪晚年所輯大事記雖未及就其經世之意亦可槩見其他所著經說海內往往家傳人誦與伊洛之書並行於世云 八月丙午宣諭云朕緣久旱不雨曉夕思所以寬卹無事不在念今且將諸路節次泛拋招軍並與蠲免 壬子召侍從官王希呂以下頒示御札曰朕謂侍從之臣當以論思獻納為任今後事有過舉政有闕失卿等即宜盡忠極言或求對或入奏務在於當理而後已各思體此

稱朕意焉 壬戌樞密院進呈淮西運判趙彥逾奏本  
路歸正人約有二千餘人強壯者欲委官總轄教閱以  
譏察其動息上曰其人歸正日久皆能耕鑿居止已安  
自成生業若遽然差官前去總轄乃所以搔擾使之不  
安劄子不須行 是月趙雄罷相出知瀘州時有言雄  
多私里黨者於是命大臣進擬皆於姓名下注本貫封  
入遂為故事 以王淮為右丞相 九月甲午進呈提  
領贍軍府燕世良申前官吳淵薦本所幹官楊絳與陞

擢差遣今復措置開請有勞乞申前命緣其人令合赴  
部改官未審如何或只與堂除知縣上曰朕方與卿等  
共守此法姑候一任回却與陞擢是月以江浙湖北  
旱出爵募民賑濟冬十月癸亥中書門下省言乾道  
八年七月內已降指揮御史臺合覺察彈劾事件並分  
隸六察如有違例去處令監察御史隨所隸所許令訪  
聞覺察聞奏詔割下御史臺六察遵守施行甲子宣  
諭付出知臨安府王佐按新寧國府監押王康成為人

便到赤岸欲上岸赴宴間康成乘馬經過不下馬上曰  
可罷新任差遣又曰所以王佐奏狀不欲徑批出施行  
尋常文字須是經由三省施行方合事體記得向來參  
政周必大曾有此請故朕遇事不忘 頒忠義傳國子  
監簿俞良能所進也起於戰國王蠟終於五代孫晟上  
下一千一百年所取者一百八十人凡二十卷乞頒之  
武學授之將帥上曰忠臣義士不顧一身誠可以表勵  
風俗 罷雪宴先是年例賀雪即賜宴以連歲荒歉艱

食詔權罷 十一月甲戌臣僚言在法諸因饑貧以同居總麻以上親與人若遺棄而為人收養者仍從其姓名不在取認之限聽養子之家申官附籍依親子孫法今之災荒亦非一處向去寒冷棄子或多若令災荒州縣坐上件法鏤板曉諭使人人通知之則人無復職認之慮而皆獲收養矣舉行荒政此其一助詔從之 辛卯進呈吏部侍郎趙汝愚奏廣招徠之路絕朋比之嫌莫若用故事令侍從兩省臺諫各舉所知若干人須才

用兼脩而未經擢用者陛下以其姓名悉付中書籍記  
候職事官有闕則選諸所表以次用之其有不如所舉  
則坐以謬舉之罪上曰此說極是可從之王淮奏御筆  
抹若干人字今乞作二三人上曰可 是月詔諸路賑  
饑 新除浙東提舉朱熹入對奏言陛下臨御二十年  
間水旱盜賊略無寧歲意者德之崇未至于天歟業之  
廣未及於地歟政之大者有未舉而小者無所繫歟刑  
之遠者或不當而近者或幸免歟君子有未用而小人



有未去歟大臣失其職而賤者竊其柄歟直諒之言罕聞而諂諛者衆歟德義之風未著而贓汙者騁歟貨賂或上流而恩澤不下究與責人或已詳而反躬有未至與夫必有是數者然後可以召災而致異又言陛下即政之初蓋嘗選建英豪任以政事不幸其間不能盡得其人是以不復廣求賢哲而姑取軟熟易制之人以充其位於是左右私褻使令之賤始得以奉燕閒備驅使而宰相之權日輕又慮其勢有所偏而因以壅已也則

或聽外廷之論將以陰察此輩之負犯而操切之陛下  
既未能循天理公聖心以正朝廷之大體則固已失其  
本矣而又欲兼聽士大夫之公言以為駕馭之術則士  
大夫之進退有時而近習之從容無間士大夫之禮貌  
既莊而難親其議論又苦而難入近習便嬖側媚之態  
既足以蠱心志其胥吏狡猾之術又足以眩聰明此其  
生熟甘苦既有所分恐陛下未及施其駕馭之術而先  
墮其數中矣是以雖欲微抑此輩而此輩之勢日重雖

欲兼採公論而士夫之勢日輕重者既挾其重以竊陛下之權輕者又借力於重以為竊位固寵之計中外相應更濟其私日往月來浸淫耗蝕使陛下之德業日隳紀綱日壞邪佞充塞貨賂公行兵愁民怨盜賊間作災異數見饑饉洊臻羣小相挺人人皆得滿其所欲惟有陛下了無所得而國家顧乃獨受其弊因論浙東救荒事上曰連年飢歉朕甚以為憂州縣檢放多是不實時熹乞勸諭推賞上曰至此却愛惜名器不得又乞撥賜

米斛上曰朕於此并無所惜又乞預放來年身丁錢上  
曰朕方欲如此措置寬卹數事熹又奏星變事上曰朕  
恐懼未嘗一日忘上又曰朕未嘗一日不三省吾身熹  
續又奏自今水旱約及三分已上即乞并第四等戶依  
此施行又奏乞推行建寧府崇安縣社倉法於諸路州  
軍熹又上宰相書云朝廷愛民之心不如惜費之甚是  
以不肯為極力救民之事明公愛國之念不如愛身之  
切是以但務為阿諛順旨之計然民之與財孰輕孰重

身之與國孰大孰小財散猶可復聚民心一失則不可  
復收身危猶可復安國勢一傾則不可復振至於民散  
國危而措身無所則其所聚有不為大盜積者耶復  
白鹿書院從朱熹之奏也洞本唐朝李渤舊居有臺榭  
環以流水雜植花木為一時之勝南唐昇元中因建學  
館買田以給諸生學者大集乃以國子監九經李善道  
為洞主掌其教授本朝太平興國二年賜以印本九經  
七年又官其洞主明起是年始置南康軍遂屬郡境至

祥符初直史館孫冕請以為歸老之地及卒葬焉其子  
比部郎中環復置學館以教子弟四方之士願就學者  
亦給其食後經兵亂屋宇不存至是復之 十二月甲  
子進呈范成大具到上元縣所種二麥王淮等奏得成  
大書謂春麥惟郭剛能言之蓋北人謂之劫麥上曰此  
間人亦不知已令宮中種看淮等奏仁宗皇祐元年五  
月召近臣以下於後苑寶岐殿觀刈麥仍諭以新創此  
殿不欲植花卉每觀種麥於此今又見其成庶知民事

之不易陛下可謂同符仁宗矣 葛郊言荒政二事一  
乞特降指揮諸經總制錢如遇州縣災傷年分本處知  
通權免比較賞罰其課利場務並令遵見行條法依所  
放災傷分數免比不得令本州抑勒縣道陪備一乞降  
旨應荒歉州縣且專以救荒為務宴會之類理合節損  
所有諸處迎新送舊兵卒公吏借請及供帳從物之屬  
所費不貲亦合裁減兵卒亦宜存留以防緩急詔並從  
之 是冬淮東提舉趙伯昌奏通泰楚州沿海去處舊

有捍海堰一道東距大海北接鹽城計二萬五千六百餘丈始自唐黜陟使李承實所建遮護民田屏蔽鹽竈歷時既久頽圯不存至本朝天聖改元范仲淹為泰州西溪鹽官方有請于朝凡調夫四萬八千用糧三萬六千有奇而錢不與焉一月而畢規模宏遠高出前古遂使海潮沮洳鹵鹵之地化為良田自後漢失修治宣和紹興以來屢被其患每一修築必至申明朝廷大興功役然後可辦望專委淮東鹽司今後捍海如遇坍塌去



處不以功役大小即便委官相視計料隨壞隨葺勿令  
寢淫以至大有衝決務要堅固可以永久從之 是歲  
詔舒州蘄州鑄鐵錢並以十五萬貫為額 詔久任四  
川監司郡守之人令更迭與東南差遣其在任未久者  
既有任滿前來奏事指揮候到闕始得別與除授從臣  
僚之請也 雨雹

壬寅淳熙九年春正月壬申朔 是月賑兩浙饑 初  
池州汪青坐盜發遞青誅後他卒事覺知非青罪詔失

入官吏趙粹中落職餘責罰有差青家支給五年王淮  
奏陛下念一夫之冤存恤其家恩及幽明矣 內出正  
月所種春麥並秀實堅好與八九月所種無異詔降付  
兩浙淮南江東西漕臣勸民布種 三月戊子臣僚言  
監司帥臣臧否所部深得考功課吏之意然郡守更易  
則人有幸不幸監司帥臣好惡不一則言有當不當有  
已去而不及臧否者有近到而已遇臧否者此人有幸  
有不幸也或取其辦事而不言其害民或喜其彌縫而

不言其踈繆或畏其彊有力而不議或以其踈遠無援而見斥此言有當不當也且就一路而言之則其數寬就數人而言之則其數窄計一歲而論之則其能否為已見計數月而論之則其能否未可知而遽臧否焉此入所以幸不幸言所以當不當也乞詔諸路監司帥臣自今臧否所部必須總計一歲人數不問已去見在就其中區別之或臧者朝廷已加擢用亦須用臧之次者或否者朝廷已行罷黜亦須具否之次者其或臧否不

當必令具析以聞詔除初到任人外餘從之是春召對楊甲尋除太學錄甲獻書萬言大略謂人主之職不過聽言用人分別邪正而近歲以來權倖用事其門如市內批一出疑謗紛然謂陛下以左右近習為腹心而不專任大臣以巡邏伺察為耳目而不用臺諫今中外文武半為權門私人親交私黨分布要近良臣吞聲義士喪氣願陛下哀之至於民兵之害兩淮百姓如被兵火舒斬鼓鑄民不堪命西南諸夷乘間出沒而

馬政日急高直厚幣以驕戎心臣恐陛下今日所少者  
非特馬而已又有司理財一切用衰陋褊隘之策至於  
賣樓店括學田鬻官地而所在爭獻羨餘此風日熾誠  
恐陛下赤子無寧歲矣其末言今日之事欲正其本則  
在陛下講學 夏五月丙子內出御筆手詔宣示宰臣  
王淮等曰朕惟監司郡守民之休戚繫焉察其人而任  
之宰相之職也苟選授之際惟計履歷之淺深不問人  
才之賢否則政治之闕孰甚於斯今後二三大臣宜體

國愛民精加考擇既按以資格又考其才行合是二者  
始可進擬夫然後事得其宜用無不當故傳曰為政在  
人卿等其謹之毋忽 六月辛酉詔浙漕行下所部州  
縣常切禁止官民戶毋得將草蕩園裏成田如失覺察  
其漕臣取旨施行 詔侍從臺諫舉官堪充監司者各  
一二名 是夏饒州飢命賑之 秋八月庚子侍從臺  
諫集議聞奏自宰相執政侍從卿監正郎貲郎分為五  
等除致仕遺表已行集議裁減外將逐如蔭補恩澤每

等降殺以兩酌中定為止數武臣比類施行宰相十人  
開府以上同執政八人太尉同侍從六人觀察使至節  
度侍御史同中散大夫至中大夫四人右武大夫至通  
侍大夫同帶職朝奉郎至朝議大夫三人職事官寺長  
貳監長至左右司諫開封少尹釐務及一年須官至朝  
奉郎并朝奉郎元帶職人因除在京職事官而寄職者  
同武翼大夫至武功大夫同非侍從官無遺表外見行  
條格致仕遺表通減三分之一餘分不減紹興初中書

舍人趙思誠上任子限負之議詔從官集議至是始用  
廷臣集議行之 淮東蝗 九月辛巳大享明堂先是  
詔少師史浩少保陳俊卿赴闕陪祀並辭不至 癸巳  
御講筵侍讀鄭丙進陸贄論奉天上尊號狀上曰德宗  
不達理如此禍難未平乃欲加上尊號 甲午淮南運  
判錢冲之言真州之東二十里有陳公塘周回百里本  
司近已興修塘岸建置斗門石碇各一所於東西湫口  
二處乞於揚子縣知縣縣尉衙內帶入兼主管陳公塘



六字庶責有所歸從之 是月以王淮梁克家為左右  
丞相 冬十一月癸酉宗正丞樓鑰對論士大夫風俗  
事上曰唐文宗說去河北賊易去朝廷朋黨難朕常笑  
之有何難事只是主聽不聽 甲戌吏部尚書鄭丙讀  
陸贄奏議奉天論蕭復狀至但垂睿詰誰敢面謾蕭復  
若相囑求則從一等何容為隱從一等儻自回互則蕭  
復不當受疑上顧丙曰德宗猜忌可謂不明丙奏曰德  
宗見理不明故每事猜忌當患難時陸贄之言多聽納

及事定後贊言多懇切亦不免見疑矣上曰此皆不學之故 庚辰鄭丙讀陸贄奏議駕幸梁州論進獻瓜果人擬官第二狀畢丙奏曰官爵天下公器人主所當吝惜上曰此人君厲世磨鈍之具又曰名器豈可假人

臣留正等曰爵祿者天下之公器而國之大柄也君以為貴則人貴之君以為賤則人賤之矣天寶之際嬖妾傾國爵以私受綱紀蕩然流弊至於肅宗大將軍告身一通纔易一醉名器抑可謂濫矣德宗且欲授官於捧瓜挈果之微豈非家法之壞至是極耶播遷之禍幾至亡國無足怪者壽皇因讀陸贄奏議乃有名器不可以假人之言二十八年之治所以官不及私昵爵罔及惡德者蓋能深戒前代之失永貽萬

世之  
則也

是月夔州路饑 十二月戊午宰執進呈乞令太學生習射事上曰向來玉津園燕射惟武臣射恐祖宗典故文臣亦當射

癸卯淳熙十年春正月戊子詔廣益復行鈔法略曰益者民資以食向也官利其贏而自鬻久為民病朕既遣使諭之得其利害以歸復謀諸在廷僉言惟允始為之更令許通商販而社官鬻民固以為利矣然利於民者

官不便焉何者鹽之息厚凡官與吏之所為妄費以濟其私者異時一出於此一旦絕之無所牟取必胥動以浮言將毀我裕民之政且朕知恤民而已浮言奚恤矧置監司守令皆以為民朕有美意弗推而廣之顧撓而壞之可乎七月一日為始罷官般官賣通行客鈔法

庚寅密院言揀汰事上曰兵不選練則不精但州郡未裕若養老人數過多艱於贍養其六年八年九年分揀汰官兵可再展半年辛卯進呈鎮江總領所乞降新

會兌換上見前具新印會子數目乃曰新印會子比舊  
又增多大凡行用會子少則重多則輕 壬辰密院進  
呈鎮江軍兵三年加減之數上曰養兵費財國用十分  
幾八分養兵周必大奏尚不啻八分上曰今民間未裕  
江東浙西寄招鎮江諸軍及武鋒軍歲額人數可並權  
免三年所有諸州日前未足之數特與蠲免 是月以  
黃洽為御史中丞自乾道五年之後不除中執法者十  
四年洽嘗奏云因言固可以知人輕聽亦至於失人是

故聽言不厭其廣廣則庶幾其無壅擇言不厭其審審則庶幾其無誤上深然之 二月癸卯用御史中丞黃洽奏詔罷內侍陳源宮觀建寧府居住先是陳源罷德壽宮提舉有旨與落階官臣僚言其過惡乞寢罷成命與一在外宮觀從之至是洽又言其罪狀灼然乞賜竄責故有是命既而臺察又疏其黨與皆一時之巨蠹於是武略大夫徐彥達除名勒停送道州編管家財產業並籍沒進納德壽宮其子徐必聞等三人並追官勒停

仍送筠州編管士昌源之厮役以違法遷轉李庚本臨  
安府都吏與源交通補官彥達嘗充德壽宮閣子庫書  
寫專一為源管家務官至正使職至路鈐皆源之力也  
三月丙寅朔建康都統制郭剛言去歲合揀汰效用  
軍義兵一百八十五人自言願得逐便欲乞揀汰上曰  
正恐離軍失所所以尚留如此與放逐便 己丑福州  
奏都巡檢姜特立捉海賊九十四名根勘二十八人招  
伏餘六十六名被虜在船不曾行劫並給據釋放上曰

趙汝愚如此處置甚善古者制刑王者言宥而有司執法若有司但務姑息何以示懲是月詔舉制科夏四月丙申詔臨安府係駐蹕之地本州屬縣民戶身丁錢可自淳熙十一年為始更與蠲放三年仍給降黃榜曉諭進呈監司帥臣奏到減否先數日上曰監司帥臣奏到守臣減否而不行黜陟何以勸懲可與後省將兩歲減否其尤者以聞是日將上減者多已用否者多已黜有未陞黜者數人前知普州范仲圭前知瓊州韓



璧前知復州王去惡皆在臧之目新萬安軍湯鸞在否  
目上曰王去惡有平黎之功而又通曉郡事可召赴行  
在范仲圭韓璧任滿與監司差遣湯鸞罷新任 癸卯  
大理寺丞張抑言浙西諸州豪宗大姓於瀕湖陂蕩各  
占為田名曰塘田於是舊為田者始隔絕水出入之地  
淳熙八年雖因臣僚劄子有旨令兩浙運司根括而八  
年之後圍裹益甚乞自今責之知縣不得給據責之縣  
尉常切巡捕責之監司常切覺察仍許人告令下之後

尚復圍裹者論如法從之 是月廣西運判王正己奏  
云陛下加惠遠方恐官賣科擾民無所告復行客鈔以  
救其弊德至渥也陛下本以寬裕遠民而今來兩路通  
行却成發泄東鈔借使兩路分畫界分西路漕計不虧  
諸郡可以支吾亭戶不致貧乏豈非陛下之本意願聞  
缺乏之端有如二十餘州上下煎熬倘有申請朝廷豈  
能坐視必須應副則東路雖有贏餘亦是朝三暮四恐  
徒紛擾又云頃年章潭為廣東提舉鹽事力主兩路通

行之議及就移西路運判客鈔不敷漕計大窘寢食幾  
廢又得東路二十八萬緡遂以少寬即同帥臣范成大  
乞行官賣此則易地而不可行者歲月未久可以覆按  
又云紹興間通行客鈔能三十餘年者以西路有折科  
招糴之類後既住罷漕計遂窘因有官賣之法其後更  
易不定大槩以東鈔通行西鈔不登為患萬一必須通  
行則西路漕計或缺亦須預作指畫不可臨期缺悞然  
不若分路為允也 五月甲子朔 是月臣僚言祖宗

用人初無清濁之別韓琦第二人進士及第未免監左  
藏庫後為度支判官皆號稱職乞明詔大臣如行在左  
藏庫之類稍重其選與免待闕遇館學有闕却於此取  
之以廣得人之路從之 鄂州都統郭果言襄陽屯田  
二十餘年雖微有所獲然未能大益邊計非田不良蓋  
人力有所未至且無專任責者或謂戰士屯田恐妨閱  
習而不知分番耕作乃所以去其驕或謂耕作勞苦恐  
其不樂而不知分給穀米人自樂從以樂從之人為實

邊之計可謂兩便本司見有荒熟田共七百五十畝乞  
降錢三萬緡收買耕牛農具便可施工餘力亦可刷荒  
田開墾從之六月丙申王淮等奏兩日酷暑聖躬得  
無煩鬱上曰朕自有道以處之但懷閭閻之民不易度  
耳往在潜邸嘗有詩云閭閻多勃鬱方愧此身閑淮奏  
陛下隆寒盛暑每以百姓為念真三五帝王之用心梁  
克家奏昔唐文宗詩云人皆苦炎熱我愛夏日長柳公  
權屬以薰風自南來殿閣生微涼君臣賡歌略無一言

及於百姓而大書殿壁自以為詞情皆足蘇軾嘗効其詩以譏之云一為居所移苦樂永相忘願言均此施清陰分四方今陛下不以隆暑為畏而長懷閭閻之苦唐之君臣見有愧云 已酉進呈太府寺丞勾昌泰蜀中制置使一負任六十州之安危或有疾病遷動自朝廷除授動經年歲方始到任願於從臣中常儲一二人於蜀中令作安撫使一旦有制置使闕使可就除其於思患預圖最係國家大事上諭宰執曰此正在卿等留意

今後欲除蜀帥須是選擇可備制置使之用者庶幾臨時不至缺事 詔經理屯田建康府御前諸軍都統制司奏近準御筆措置屯田契勘淮西荒閑田土如昨來和州興置屯田五百餘所廬州管下亦有三十六圍皆頻江臨湖號稱沃壤自後廢罷撥還逐州召人請佃尋許承買今多為良田自餘荒地亦有豪強之戶冒耕包占詔令淮西帥漕司同共取見係官田畝實數聞奏都統郭剛尋奏相視得和州歷陽縣荒圩五百餘頃可以

開耕每田一頃三人分耕合用官兵一千五百人建康  
留守錢良臣亦奏上元縣荒圩并寨地五百餘頃不礙  
民間泄水可以修築開耕 辛酉詔曰朕履四海之籍  
託王公之上深惟民之未贍惻怛在心惟吏或不良無  
以宣德明恩若乃貪饕無厭與貸為市漁奪百姓侵牟  
下民有一於斯足耗邦政天下之大郡邑之衆假勢放  
利實繁有徒若此朕雖有愛民勤政之誠焦勞於上仁  
恩利澤何由而下究哉朕嗣服之初蓋嘗考法祖宗嚴



賊吏之禁其持心不移覆出為惡者既已逮治一二厲  
在位矣歲月既久法以延緩賊過之吏忸習寬政日甚  
歲劇今列官處職奸法不忌是與盜無異也國有憲法  
朕不敢廢可自今後命官犯自盜枉法贓罪抵死者籍  
沒家財取旨決配並依隆興二年九月已降詔書施行  
必無容貸是月兩浙水命賑之監察御史陳賈奏  
略曰臣竊謂天下之士所學於聖人之道者未始不同  
既同矣而謂已之學獨異於人是必假其名以濟其偽

者也邪正之辨誠與偽而已表裏相副是之謂誠言行相違是之謂偽臣伏見近世士夫有所謂道學者其說以謹獨為能以踐履為高以正心誠意克己復禮為事若此之類皆學者所共學也而其徒乃謂己獨能之夷攷其所為則又大不然不幾於假其名以濟其偽者耶臣願陛下明詔中外痛革此習每於聽納除授之間考察其人擯棄勿用以示好惡之所在庶幾多士靡然向風言行表裏一出於正無或肆為詭異以干治體從之

廣西運司申昭州金坑五處遞年所入不多若行廢  
罷以裕民間甚便本部欲行契勘上曰不必契勘便行  
廢罷 詔監司帥臣每歲於部內舉廉吏一二人具實  
迹來上中書籍記以備選擇如無聽闕 秋七月乙丑  
詔知廣州鞏湘以任帥閫備著效勞可除龍圖閣令再  
任 庚午禮部太常寺言開寶通禮州縣水旱則祈社  
稷典禮具存政和五禮新儀雖不該載見今朝廷或遇  
水旱亦行祈禱今欲從臣僚所陳遇有水旱令州縣先

祈社稷委合典禮乞朝廷指揮從禮部太常寺修定儀  
注行下詔從之先是臣僚言州縣遭水旱神祠佛宮無  
不遍走而社稷壇壝闕然莫或顧省彼五土五穀之神  
百代是尊是奉豈應祈報獨不得與羣祀同享精純於  
是下禮寺看詳而有是命 甲戌詔曰朕涉道日寡兼  
事不明政化失中以干陰陽之和廼季夏涉秋旱暵為  
虐大田失望民靡錯躬夕惕以思反己自咎可自今月  
十三日避殿減膳令侍從臺諫兩省卿監郎官館職各

條具朝政闕失母有所隱朕將親覽考求其當以輔政  
理咨爾在位副朕志焉 乙亥詔曾任知州而為郎官  
卿監曾任卿監郎官而復出為監司之人陳乞闕陞者  
依兩任無人薦舉處條例特與免用舉主理為資序從  
臣僚之請也 癸未宰相王淮梁克家知院周必大劄  
書兼權參政施師點以旱乞避位詔不允上宣諭曰朕  
心未嘗放下一日之間天下定行一兩遭又曰數日羣  
臣應詔言事並無及朕過失多言刑獄事刑獄自有成

法王淮對曰陛下憂勤如此更有何過失可指 己丑  
臣僚乞詔大臣自今維揚合肥荆襄四路帥當於嘗任  
近臣中簡記除授上曰均是帥臣豈可輕授此在卿等  
簡擇 八月甲辰進呈次因論人才上曰若是平穩無  
才略人不難得須是有材而不刻慈善而不謬王淮等  
奏陛下二語可謂盡用人之要大抵有材者多失之刻  
慈善者多失之謬 乙巳進呈楊安誠劄子乞遵依仁  
宗皇帝之制采用司馬光之言覈實浮費量加撙節上

曰近日臣僚言多用司馬光撙節之說蓋仁宗時亦自  
乏用故司馬光有是言朕嘗見一老內臣云哲宗皇帝  
極愛惜錢物不肯多賞賜臣下王淮等奏節用裕民之  
本陛下常以祖宗為法天下之福也 戊申詔侍從兩  
省管軍知閣御帶及在內觀察使以上於武官中各舉  
有威儀善應對堪充奉使接送伴者一名聞奏其已被  
差人不許薦舉 辛亥進呈湖北總司乞糴米事因言  
得湖北報七月十八日大雨霽霽秋成可望上曰是日

朕食素就宮中設醮但見陰雲四合不知得雨之廣王  
淮奏曰經所謂惟德動天無遠弗届上曰人主於天尤  
親感召之速終是異於臣庶 庚申詔左藏南庫撥隸  
戶部提領所事務限五日結局先是戶部具南庫收支  
項日上謂輔臣曰見在錢三十五萬餘貫盡撥付戶部  
其餘金銀等物令陳居仁點檢具數以聞上又曰欲併  
南庫歸左藏令版曹自理會朕亦省事卿等可予細令  
具南庫五年間出入帳親自點檢故有是詔南庫者本



御前樁管激賞庫也休兵後秦檜取戶部窠名之可必  
者盡入此庫戶部闕乏則予之檜死屬之御前由是金  
帛山積上即位之始年納右正言袁孚之請遂改為左  
藏南庫專一樁管應副軍期然南庫移用皆自朝廷非  
若左帑直隸於版曹而為經費也至是始併歸戶部既  
而尚書王佐奏言南庫歸版曹無益而有損乞就撥歸  
封樁庫其朝廷年例合還戶部錢却於封樁庫支不從  
戶部尚書王佐言經總制錢歲額一千五百萬貫年

來寢生姦弊或偶無收則便於帳內豁除而創生窠名更不入帳分隸遞年積壓直待赦放切恐暗失經費詔戶部將淳熙八年終以前拖欠及未起錢數並特除放自今收赴虧額其知通并提刑司官屬委本部覺察從條施行是月宰執奏封樁庫見管錢物已及三千餘萬緡上曰朕創此庫以備緩急之用未嘗敢私也封樁庫者亦上所創也其法非奉親非軍需不支先是六年夏四月提領本庫言共管見錢五百三十萬貫其後往

往以犒軍或造軍器為名撥入內庫或睿思殿或御前  
庫或修內司有司不敢執尋又奏內外椿積緡錢四千  
七百餘萬上曰何以聚人曰財周以冢宰制國用周禮  
一書理財居其半後世儒者尚清談以理財為俗務可  
謂不知本矣祖宗勤儉方全盛時財賦亦自不足至變  
更鹽法侵及富商朕二稅之外未嘗一毫妄取亦無一  
毫妄費所以帑藏不至空虛緩急不取之民非小補也  
先是上以諸路財賦浩繁令兩侍郎分路管認是年

王佐為尚書又請於次年四月將諸路監司守倅所起上供錢比較以定賞罰自是罕有逋欠 九月壬午詔諸路州軍拖欠內藏庫諸色窠名錢物自淳熙九年終以前實欠並特與除放以後常切催納如有違慢仰本庫開具所欠州軍當職官吏取旨施行翌日王淮等奏聖恩溥博不知所欠數若干上曰六十萬貫 癸未興元府都統制吳玠言本司同安撫司增置賞錢募人告捉盜販解監入界見係出戍官兵把截去處嚴行搜捕

外有不係官兵出戍地分乞行下沿邊州郡督責捕盜  
官司搜捕詔利路安撫提舉各申嚴行下階成西和鳳  
州禁止毋得透漏如未覺察守令並取旨重作施行  
冬十月甲午詔主管魏惠憲王府鄧從義可傳旨羅忠  
并母白氏今來皇孫女安康郡主凡百宜執婦道不可  
慣縱所有晨昏安省之禮候得指揮方免若旦望節序  
並從常禮務成肅雖之德倘或違此別有誥訓

臣留正等曰周之王姬能執婦道詩人歌之王珪受  
公主謁見前史以為美談今觀安康下嫁聖訓申誠

誨切如初其所以經夫婦  
美教化之意視古有光矣

乙未右正言蔣繼周言國家役法自祖宗以來前後  
講論詳矣行之其或不能無弊者非法弊也人弊之耳  
苟得一賢令尹則人樂為之爭先是知其弊誠在人而  
不在法自范成大唱為義役之說在人著目而處州六  
邑之民擾擾乎十有六年於此矣夫狹鄉民貧私相借  
助以供公上之役是持鄉里常情耳成大張大其事標  
以義名且欲改賜縣名行之諸路朝廷固已察其情狀

不可其請矣成大不已再有所陳囑其代者使遂其說  
至陳孺知處州親受其弊任滿奏事乃始備言其實陛  
下即可其奏於是處州之民始獲息肩於義役之罷三  
兩年來舊說復作一布衣之上書未必公言朝廷令守  
臣李翔看詳蓋欲其詳酌可否曾不能參照案牘博詢  
民言辨范成大陳孺所奏虛實有請于朝而罷之乃從  
而附會其說斷以己見官民僧道出田一等他日貧富  
置之不問人以為重擾條畫利害訟于烏臺臣嘗問鄉

閭出田助役然則何用曰將以賂胥吏有常數也吏胥之誅求於執役者官立法以禁之猶懼其不懲使上之人通知之其何以訓夫立賞以誘之而舉行者不加勸立罰以威之而沮敗者不加畏給官田以助役亦終於不可行則出私田者民情之不樂從可見矣欲望特降睿旨將處州及兩浙有見行助役去處聽從民便令官司不得干預其間民自難久行或不能息爭訟仰州縣遵依見行條法照應物力資次依公差募仍乞將李翔



罷黜以謝處州兩浙十五六年間義役之擾從之 丁  
未進呈大理寺奏內侍之子賈俊民等代筆案俊民當  
降一官勒停上初欲貸其勒停而更降一官又思餘人  
亦當視此以降罪乃曰人有一點私心法便不可行並  
如奏次日王淮等奏陛下用法如此可謂至公上曰不  
怕念起惟恐覺遲然人之所以未免一念之起者正以  
脩行未到淮等奏陛下每言唐太宗未嘗無過只是覺  
得早陛下可謂覺得早矣上曰凡事順其自然無容私

其間豈不心逸日休 先是詔廣鹽復行鈔法罷官般  
官賣是月廣東提舉常平茶鹽韓璧奏略云臣叨恩備  
數東路提鹽同措置西路鹽事所以東路事體尚須到  
官悉心推究至如西路臣三任九年之間粗知其略廣  
西民力至貧歲入至薄官兵備邊之費盡取辦於般賣  
猶懼弗給今一旦任賣束手無策全仰給於漕司往年  
改行鈔法時自有漕司應副逐州取撥窠名數目可舉  
而行又朝廷頒降祠部及會子錢計四十萬下西路漕

司通融為十年支遣及諸州各有漕司寄椿錢以此隨  
其多寡應副諸州缺乏之數使足以供公上贍官吏養  
兵備邊則可以堅客鈔之行上副陛下改法裕民之意  
尋詔於支降四十萬數內權支二萬貫付靜江府五萬  
貫分給諸州軍充淳熙十一年歲計支遣一次續又從  
諸司申請撥廣東增賣鹽鈔剩錢五萬貫及令封椿庫  
支會五萬貫充廣西十二年分歲計十一月壬戌朔  
日有食之癸酉進呈舊按閱犒賞例上曰處分已定

不須舊例盡是內庫支一色見錢此錢樁留朕初無他用王淮等奏陛下平日未嘗妄費今以激厲士卒人百其勇上因言士氣要須激厲每戒主將云卒伍遇戰未可使用大陣且以小陣試之每一捷即加賞賚將見人自奮是日進呈欲召為郎者六人上熟視曰陳達善得沈密一亦可此文字且留中王淮等奏用人不厭詳細須是參較方可甲戌上幸龍山教場大閱大犒兵師為錢三十六萬丁丑進呈畢上出癸酉留中文

字及錄示王尚之等六人曰朕兩日於班簿中檢得此  
數人可並召赴行在餘亦難得又諭却於寺監丞中揀  
人為提舉如此更迭出入則所用之人源源不絕是  
月命賑京西飢言者謂自乾道五年降會子付兩淮  
收換銅錢又節次支舒蘄鐵錢換易凡十六次指揮至  
今十五年私渡銅錢常自若也乞多給會子立限盡換  
詔兩淮各支降會子一十萬貫限兩月收換其換到銅  
錢淮東赴鎮江淮西赴建康送納樁管閏十一月乙

未上曰諸軍近日教閱聞得錢甚喜多有買柴作歲計  
王淮等奏緣此街上見錢甚多上曰聞外間米麵甚平  
見老兵云三十文買麵一碗可飽終日街上多有醉人  
朕得百姓懽樂雖自病亦不妨所謂吾雖瘠天下肥矣  
壬寅進呈廣西經略安撫司奏安南國牒已排辦章  
表投進方物上曰象乃無用之物經由道路重擾吾民  
除不受外將入貢之物以十分為率止受一分就界上  
交割厚與回賜章表令入遞降書回答 十二月丙子

車駕詣德壽宮行太上皇后慶壽宮中之禮詔曰朕荷  
太上之燕謀承至尊之休德順稽帝道丕迪重華之徽  
寅賴母儀胥洽二南之化惟天純佑俾國多祥皇年方  
衍於萬春甲歷曩登於七帙奉卮介壽嘗祗闡於宏休  
含飴保和茲繼符於昌筭繫我家之累盛軼聯冊之前  
聞爰舉曠文躬伸慶禮上南山之祝永偕慈極之隆首  
東秩之辰肆推凱澤之被式敦及老之義併彰錫類之  
仁可大赦天下戊寅王淮等奏前日行慶壽禮天氣甚

好上曰中外懽悅二親和氣不可形容所以歸晚是月數文閣直學士致仕李椿卒椿嘗為樞密院檢詳文字時張說為僉書會小吏有持南丹州莫酋表來求自宜州市馬者因說以聞椿白邕遠宜近官非不知也故迂之者豈無意哉莫氏方橫奈何導之以中國地理之近請治小臣引致邊事之罪說又建議募民為兵以所募多寡與賞罰格以勸沮州郡椿白說若此則恐必有以捕為募而致驚擾者願毋限額為司農卿日嘗言於



制國用者曰今倉庾所用一月營一月之聚帑藏所給  
一旬貸一旬之錢朝廷之與戶部遂分彼此告借之與  
索償有同市道此陽城所以惡裴延齡者願輩而正之  
權臨安府故事府有中人承受公事守至必謁椿弗謁  
曰廟堂無所用承受知婺州有旨令婺市皮角若干而  
筋五千斤椿奏一牛之筋四兩是屠二萬牛也上為收  
前詔為吏部侍郎上親慮囚命椿與張掄敘囚徒掄官  
承宣使奏牘欲列名椿右不可白丞相丞相令先掄椿

退謂權要恃恩不足恠廟堂曲徇為可畏草奏言臣固知承宣使序權侍郎之上但使事以閣門副侍郎耳所被旨臣名實在上不可不正章未達而事聞掄亟罷侍衛司兵囚兢而碎僧舍新補軍頭乘忿而剽都市朝廷不深治椿舉張彞之事為戒言官彈劾不勝去職所從風聞者黥隸椿言非置臺諫為耳目之本意軍中結邏者以搖主將攜摘騰播椿請嚴階級之法又極言閹寺之盛曰自古宦官之盛衰係有國之興亡其盛也始則

人畏之甚則人惡之極則羣起而攻之漢唐勿論靖康  
明受之禍未遠今畏之矣未甚惡也有以裁制之不使  
至極則國家免於前日之患宦官亦保其富貴願官置  
蚕室而限其數復祖宗之制官高者補外又門禁宮戒  
之外勿使預於人材政事又嚴士大夫兵將官與之交  
通之禁椿嘗論渡江以來茶法之弊謂官執空券市之  
園戶州縣歲額配之於民卒有賴文武之寇初廣西鹽  
法官自鬻之後改鈔法漕計大窘乃盡以一路田租之

米二十二萬斛令民戶折而輸錢至五倍其估民既為錢二十餘州吏祿兵稍無以給則又損其估以市於民曰和糴曰招糴民愈病久之鈔弗售者三年椿請改法從舊除民折苗和糴招糴官民俱便權知和州錢之望言歷陽縣含山縣有麻澧二湖灌溉民田為利甚博乾道二年因守臣胡昉鑿千秋澗以設險澗既開通而二湖之水始洩入江積十餘年澗水日洩灌溉之利遂廢今欲於千秋置斗門以防湖水之洩遇大浸則啓之

以出外遇旱暵則用之以瀦水俾二湖之灌溉如初又不妨千秋澗之險從之是歲知遂寧府李燾上續資治通鑑長編至靖康全書共九百八十卷舉要六十八卷

甲辰淳熙十一年春正月辛卯朔雨土辛丑詔浙東提舉司將開掘過白馬湖為田去處並立板榜每季檢舉曉諭人戶日後不得再有侵占仍仰本司覺察毋致違犯丙午監察御史謝諤言去年十月四日臣僚言

因處州守臣不合將義役置冊假以藉手干求差遣力陳其弊奉旨依奏其所奏係是兩項第一項云將處州及兩浙有見行助役去處聽從民便令官司即不得干預第二項云其民間自難久行不能息爭訟者仰州縣遵依見行條法照應物力資次從公差募第一項是行義役第二項是行差役也言者之意欲差役義役二者並行元不曾指名言盡罷義役兼但言兩浙之弊不曾言及別路也近訪聞江東西諸路累年民間有便於義

役之處官司乘此頗有搖動蓋民間舊因差役吏緣為  
奸當差之時枚舉數名廣行追擾望其脫免邀求貨賂  
使之爭訟至有累月而不定者民戶因此多有困竭緣  
行義役遂頗便之自此法之行胥吏縮手無措日夕伺  
隙思敗其謀近有饒州德興縣吉州吉水人戶赴臺陳  
訴其詞激切端有可憫乞下諸路監司州縣應有義役  
當從民便外其不願義役及自有爭訟乃行差役兩項  
並合遵守違者許提舉司按奏其德興縣人戶並賣出

本縣舊刊義役石碑可見經久之計民情之所安惟恐  
官司撓其成法上曰前日蔣繼周言處州守臣專行義  
役之弊今諤欲義役差役各從民便法意補得始圓今  
照前降指揮施行 甲寅雨土 是月戶部奏言去歲  
旱傷計減放六十萬石上初欲下漕臣覈實既而曰若  
爾則來年州郡必懷疑不與檢放矣 二月甲子進呈  
擬張叔椿等差除上曰今後有卿不除少有少不除卿  
所謂官不必備又宣諭今後蜀中監司可間差此中人



往若皆蜀人則人情宛轉甚非法度 癸酉進呈次諭  
熊克台州當赴上卿等曾以朕意宣諭否克為人性緩  
古人有韋弦之戒緩者勉之急者緩之全在抑揚之道  
詔已降指揮溫台被水逐州守臣王之望陳巖肖各  
不即聞奏乃賑恤遲緩之望特降一官巖肖落職放罷  
近台州獲海賊首領溫州獲次首領王之望陳巖肖各  
有捕賊之勞以功補過之望放罷巖肖宮觀 是月樞  
密院奏兩淮京西湖北路民兵萬弩手自淳熙七年後

不曾拘集教閱乞令逐路安撫司行下所部州軍常令不妨本業在家閱習俟農隙照年例拘集比試其有事藝高強之人每州許解發一二名從帥司保明津發赴樞密院與依四川義士條例按試補授以示激勸詔從之三月辛卯進呈耿延年狀翻鑄到淳熙十一年錢樣上曰且用舊樣不必頻改是日進呈刑部侍郎曾逮奏乞依乾道九年三月二十三日指揮令刑部長貳郎官并巡察御史每月通輪錄囚具名件聞奏庶得糾

察之職稍復祖宗之制上曰可令用每季仲月於是詔  
令刑部御史臺於每季仲月親錄囚徒 乙巳詔知福  
州趙汝愚除敷文待制再任上宣諭汝愚在福州甚宣  
力 庚戌詔知泉州司馬伋除龍圖待制再任兩浙運  
判張昞除徽猷閣兼轉運副使再任 是月親試舉人  
賜衛涇以下及第出身有差 趙傑之知太湖縣有言  
其不丁繼母憂者上諭宰臣王淮等曰士大夫一被此  
名終身不可贖行遣中稍為宛轉不須明言其罪遂降

一官放罷聖度之忠厚如此 夏四月辛酉詔金州依見行鹽法聽客人鋪戶從便買賣不得依前置場拘權癸酉詔廣西經略詹儀之運判胡庭直開具到見行鹽鈔已為詳細可恣意奉行先是知容州范德勤奏廣西賣鹽不便詔儀之庭直公共詳議具奏於是儀之等條析奏聞今詳議靜江府等一十六州官賣鹽以救一十六州之害但罷高化等五州敷賣二分食鹽令轉運司置鋪出賣從便請買以為五州之利所有五州歲計

令轉運司計度抱認應副如是則一路二十五州無不  
均被聖澤析苗科敷之弊可以永革而民力裕又言淳  
熙十年七月一日改行客鈔至今年三月十日終已招  
賣過鹽鈔六萬二千羅見今客人不住搬販措置自有  
次第故有是詔高化雷廉欽五州產鹽地分客鈔不行  
尋又奏欽州白皮鹽場事體與雷廉高化一同乞依舊  
興復以備本司取撥作鈔鹽支付客旅搬請 丙子進  
呈進士射射日分上曰進士射射甚好王淮等奏孔子

射於矍相之圃觀者如堵牆古人以射為重後世乃廢而不講上曰古者有文事必有武備後世不知此意所以朕舉行之 丁酉權知均州何惟清言解鹽除京西客人搬販外更有均房界入川者甚多皆是取馬官兵附帶而去乞嚴賜約束從之 是月御製送行詩賜太保史浩又書明良慶會之閣六字賜之 五月辛卯進呈知龍州張熹充廉吏上曰廉吏最難得近不住懲戒而貪黷尚多張熹果如何王淮等奏蜀士皆稱其操履

上曰可與提刑差遣仍報行所薦劄予以厲士俗 乙  
未權知和州錢之望奏本州屯田事先一日上謂王淮  
等曰之望言課耕無法士卒惰者無以厲而勤者無所  
勸卿等可詳議奏來既而進呈欲令淮西總漕同建康  
副統制詳議以聞 右正言蔣繼周言比朝廷集議監  
司守倅接送等物嚴為限制所以節浮費寬民力也其  
有諸路藩府及列郡守暫差監司或他州通判等兼攝  
上下馬饋送并借請公用亦已約束而偏方小壘間有

違戾或權官被差而不就或已權不便而求歸須申上司又別差官年歲之間接送數次郡計有限誠何以堪乞詔遠郡闕守處令監司選差以次官兼權庶免將迎之費以蘇郡計從之 丙午蔣繼周言溫處流民丁籍尚存諸縣催科無人供納或其家丁壯既去老弱獨留監繫輸項急如星火因而多糾未成丁人名為充代追擾不能安居欲乞令溫處守臣將屬縣流移人戶覈實除落丁籍不得存留抑勒賠填如違令監司覺察以聞



從之 甲寅詔四川駐劄御前諸軍將士戍邊滋久常  
軫朕懷可令總領所支撥樁管錢引三十萬道特與犒  
設一次傳鈞彭杲守邊累年軍政修舉內傳鈞與陞都  
統制彭杲可帶吉州刺史 乙卯詔令江東提舉司行  
下建康府太平州寧國府池州饒州廣德軍南康軍建  
昌縣各多支常平錢米將被水人戶優加存恤務要實  
惠及民毋致失所 六月戊午朔詔諸軍陞差蓋擇將  
之根本必有智勇勞效乃能服衆今後宜精加選用毋

得循習苟且仍令樞密院自淮備將以上至統制官每  
全軍各為一籍逐月揭貼進入朕當間點三兩名審觀  
識略事藝隨其能否議主帥之賞罰臣僚訪聞諸州  
軍受納夏稅官吏邀阻間有將堪好絹帛强行打退却  
置場用低價收買其官中既已買下退絹多作畸零折  
納高價不恤民病利其贏餘欲望嚴禁今後州軍置場  
收買退絹許人戶越訴令監司御史覺察違戾科罪從  
之詔建寧府淳熙九年分人戶欠二稅等錢三萬四

千三百十九貫並令除放 辛酉進呈王淮等上表為  
敕令所編類寬恤詔令成書乞頒降施行上曰可謂詳  
備凡事在人舉行斟酌輕重盡之矣 壬戌進呈祕書  
省校書郎奚商衡奏制科取士勿拘三歲之制上曰賢  
良得人國家盛事可令學士院降詔有合召試人舉官  
即以名聞

大事記曰國家以科舉士而魏掇之以布衣召對未  
嘗限以科舉國家以資格任官而未熹不由舉主特  
與改秩未嘗拘以資格國家三歲舉制科而淳熙詔  
有合試人舉官即以名聞而不拘三歲之制故陳亮

以布衣六達帝庭上書敢於  
論恢復論宰相而人才奮矣

甲子進呈王渥奏小路蠻擊虛狼事上論及恩威之  
意且曰國家兵威不及漢唐遠甚所恃者其天乎澶淵  
之役辛巳之役匪天而何王淮奏人君平時仁心厚澤  
固結民心我無失德而天之所助者順蓋以理勝不在  
力勝上曰漢武帝時兵威震懾萬里之外又何可當但  
失之已甚丙寅臣僚乞詔諸路總領各密舉偏裨將  
校可為將帥者不限負數列其所長保明來上令密院

籍記考察不如所舉坐繆舉之罰從之 是日進呈趙  
汝誼言詳議到屯田事遇一圩水退諸圩兵卒併力耕  
種至立秋止秋成穀熟施工力者皆預分穀之數上曰  
若將來所收不多朕不惜幾萬米分屯田人兵使之亦  
如豐年則更相勸勉 己巳詔雨澤稍愆屢降寬恤指  
揮其人戶夏稅和買催納起綱自有條限訪聞官司趣  
辦追擾致傷和氣仰監司嚴行禁止倘或違戾御史臺  
覺察彈劾 丙子鄂州江陵都統制郭杲言昨蒙降錢

三萬貫措置屯田除節次收買牛具創造寨舍乞於上  
件錢內更存留一萬二千貫付牛僦收管准備接續餘  
錢乞拘收赴元降處回納詔令郭杲將回納會子二萬  
貫於內支一萬四千一百貫付牛僦貼充犒軍餘錢就  
行椿留准備屯田支用 庚辰知臨安府張杓言乞將  
浙西江東諸縣自淳熙十年以前所欠窠名錢三萬七  
千二百四十餘貫米八百三十餘石盡行蠲放從之  
癸未戶部韓彥質言州郡財賦場務縣道所入財穀皆

有名色在法不得移易而守臣無忌憚者竭公帑之儲以快私欲至於終更席卷而去不恤後人乞今後守臣任滿將所留諸色錢穀交割下政其數申戶部置籍上曰須令後政限一月具數申戶部照會王淮奏前政只言數贏後政只言數縮合令前後政各具數申上曰過限不申去處令戶部以聞是夏知婺州洪邁奏本州負郭金華縣田土多沙勢不受水五日不雨則旱及之故境內陂湖最當繕治而本縣丞江士龍獨能以身任

責深入阡陌諭令修築令耕者出力而田主出穀以食之  
凡為官私塘堰及湖總之為八百三十七所以畝計者  
合萬有九千用民之力二萬七千有奇田之被澤者二  
千餘頃皆因其故跡葺而深之於官無所費於民不告  
勞三二十年之中度亦未至墮廢使食君之祿者皆能  
如是豈不大有補於王政而士龍者上不因官司之督  
責下不因邑民之訴請自以職所當為勇於立事用意  
如此誠為可嘉乞加獎激以為州縣小吏赴功趨事之



勸從之 秋七月戊子右正言蔣繼周言乞詔諸軍將  
佐屯駐去處自今並不許私置田宅房廊質庫邸舍及  
私自興販營運從之 己丑郭杲言木渠下荒田實有  
堪耕種一百九頃四十四畝除已差撥官兵二百人前  
去開荒其餘不通水利高仰田亦令耕種官兵差去合  
請錢米就屯田官所管稻穀內借支將來收子課折還  
詔郭杲將高仰田段更切措置開耕毋致荒閑餘依所  
乞 校書郎羅點言比年以來所在流配人甚衆強盜

之獄每案必有逃卒積此不已為害不細切謂欲戢盜賊不可不銷逃亡之卒欲銷逃亡之卒不可不減刺配之法望詔有司將見行刺配情輕者從寬減降別定居役或編管之令其應配者檢會淳熙元年五月指揮擇其強壯刺充屯駐大軍庶幾州郡黥配之卒漸少上曰近歲配隸稍多之後當如何王淮等奏如雜犯死罪猶可從輕至如劫盜六項指揮之行為盜者莫不曉得將欲為盜必先虛立為首之名殺人奸濫之罪皆歸之以

故為首者不獲而犯者免死盜何由懲上曰可令刑寺  
集議奏聞既而刑部大理寺奏上壬寅進呈上曰朕夜  
來思量配法雜犯死罪只配本州牢城犯私茶鹽之類  
不必遠配只刺充本州廂軍令着役若是劫盜已經三  
次便可致之死可諭刑寺官子細商量奏來 乙卯淮  
西總領趙汝誼言和州八家圩西蓁芬散水地打量得  
六頃五十畝乞撥付屯田官兵計置開耕及下和州將  
不堪開耕不敷元數田二十九頃七十九畝日下別踏

遂係官荒閒田土撥付總轄屯田官補填元管之數從之密院言八年四月二十九日指揮江上軍帥於統領中薦舉人才限以三人之數深慮搜求未廣詔令照八年指揮不限負數薦舉臣僚乞戒飭帥守監司列薦宰邑之官當務至公毋徇私情當求實跡毋採虛言後不如舉必行繆舉之罰其他列薦所部官吏併加申儆從之是月以泉州興化軍饑諸州水興元府旱並命賑之八月辛酉詔浙西諸州府各將管下舊來

圍田去處明立標記仍榜諭官民戶今後不得於標記  
外再有圍裹 戊辰給舍看詳趙汝誼奏乞行下守臣  
遇客販米不得阻遏其免收力勝錢一項自有見行約  
束如有違戾及以唱花為名故作留滯者許客人赴監  
司臺部越訴重寘典憲從之 九月戊子樞密院言準  
御筆處分聞隴蜀向來軍陣多用純隊近易為花裝二  
者孰便仰四川駐劄御前諸軍都統制吳挺等條具奏  
來興州吳挺奏行軍用師惟尚整肅其花裝隊未戰先

已錯雜興化府彭杲奏四川諸軍昨自紹興之初團結  
皆為純隊以五十六人為隊止是教習純隊事藝兵刃  
相接取便應用金州傅鈞奏隴蜀山川平陸少而險阻  
多兩軍相遇或我高而彼下必須純用弓弩狹隘相遇  
則純用戈戟緩急全隊呼索易於應集詔並依舊純隊  
辛丑上諭宰執曰每月財賦冊今後更令進入欲加  
增減 戊申勘會諸路州軍義倉米斛在法合隨正苗  
交納唯充賑糶今來收成在即當議指揮詔諸路提舉

常平官各行下所部州軍仰隨鄉分豐歉依條收納入倉不得侵隱他用候歲終具舊管及新收數目申尚書省詔侍講侍讀見今進講周易將欲終篇可自開講日每日講兩卦冬十月乙丑侍讀張大經等奏伏觀陛下嘗因講泰卦之九二玉音有曰君子以其類進而為善小人以其類進而為惡未有無助者也講萃卦之上六玉音有曰盛極則衰亂極生治三復聖言皆已深得大易之旨欲望聖慈宣付史館詔從之丙寅進呈

吏部奏臣僚乞賓州三縣通差文武臣上曰武臣中極難得人小使臣尤不歷練今委以一縣只是害及一縣百姓 庚午中書門下省勘會州縣稅場所收課息自可足用訪聞近來官司過數增收以資妄用致害民旅理合禁止詔戶部遍牒諸路州軍將應管稅務合趨課息如實及租額之數即不得抑令增收敢有違戾在內委御史臺彈奏在外委監司覺察仍許被擾人戶越訴 辛巳詔宇文虛中特更與恩澤二名令曾孫承受



臣留正曰宇文虛中之忠亦可得而放矣方建炎之初以資政大學士奉命往使金國留繫軍廷抗節不屈故相秦檜用事盡歸其咎於北方則紹興十二年也虛中在北方久其諸名王大族皆尊信之不疑因與其子宇文師援暨偽翰林學士高士譚謀為復讐之舉欲因九月金主祭天而劫之金之諸王宗親約為內應不幸而功不成者天也而敵人自此上下相疑寢行誅戮矣虛中之家已碎於敵手跡其禍端由於蠟彈之繳還則秦檜之為也是時國家中興二十年而虛中之事不顯最後魏國公張浚招韓王來歸始能言其詳虛中無子有女以族人紹節為之孫明詔命以京秩至是復加褒恩及其曾孫與其外孫所以勸天下之為人臣者也

壬午吉肇乞招建康水軍戰船捎手上曰大江之險

人命所係蓋藉操舟之人可與招收是月詔程大昌  
程叔達單夔趙師夔各貶秩二等以臣僚言蔣億以賊  
抵罪于今一年未聞舉主自劾而有司亦不約法以聞  
乞令吏部檢舉故有是命十一月丙戌朔宰執謝賜  
太上稽山詩石刻上曰太上詩規模宏大所以賜卿者  
正欲仰體太上之意如屬意種蠡臣之句卿等切勿分  
別文武便有晉室之風當視之如一擇才行兼備者用  
之若曰好士人而才不適用亦何足取戊子知婺州

洪邁言本州淳熙八年旱歉支降豐儲倉米五萬石賑糶內二千一百餘石係攬載船梢盤剝折欠已納到六千餘貫外淨欠錢一千九百餘貫約米五百三十餘石乞照紹興府體例蠲放從之 利路帥憲茶馬司奏知

鳳州余永弼知文州鄧樞政績上曰邊郡政要得人永弼樞各轉一官候任滿與再任 詔向來趙善杰所修海鹽縣堰閘及劉侯修華亭縣塘堰令劉穎親往相視目今有無衝決損壞并本州去年所修水利於今年有

無實被灌溉田畝及未盡去處開具奏聞 辛卯置萬  
州南浦縣漁陽井鹽官一員并歲收鹽十四萬六千三  
百餘斤初以主簿兼監於是始專置官 戶部侍郎葉  
翦乞行下覈實免丁錢事上曰此戶部自可理會不必  
降旨 辛亥進呈淮西總領趙汝誼奏和州屯田所收  
物料未曾均給上曰可令總領所都統司將屯田力耕  
官兵斟量工力多寡拘今年收到物料實數分作三等  
次第均給 是月兩浙運副劉敏士運判姚憲并降官

落職新江東提刑王彥淇別與差遣並以溫台二州灾  
澇失於按劾守臣也 十二月丁巳兩浙運判錢冲之  
言奉詔相視開濬常潤等運河淺澁去處今相度自臨  
安至鎮江四郡共用六萬餘夫委是大役乞令諸州將  
運河兩岸支港地勢卑下泄水去處牢固捺成堰埭仍  
申嚴諸閘啓閉之法淺澁去處令逐州守臣措置隨宜  
開撩務要舟楫通行從之 己未詔秘閣修撰知隆興  
府程叔達除集英殿撰再任 丁卯進呈知州軍除目

上逐一問其人才如何至劉堽知滁州魏敏哲知濠州  
上曰淮郡不可輕此二人更契勘又曰選擇人才治道  
之急者州郡若不得人雖諄諄日降詔令亦是徒然卿  
等今後每遇一闕須是遍選終竟有得因言今之議者  
多言邊郡太守須是久任今邊郡無兵雖久任何益大  
軍皆在江南若是創置又費衣糧却是萬弩手民兵無  
養兵之費有養兵之實緩急亦可用 丁丑戶部言建  
康府申乞將沙田許從官田所取畫降指揮與免十料

催科外其沙地蘆場乞自初生年分起料催納稅租從之已卯進呈解元振奏乞令光州依舒州蘄州置監鑄錢上曰此事難行後次鑄到鐵錢時可令分二三萬與光州是月知台州熊克上九朝通略是歲知鎮江耿秉奏三縣歲額畸零錢八千餘貫今以公庫所節浮費代充解發若非得旨則恐後人數之於民上曰以寬剩之錢為民代納固善後人若無餘則必別作名色科配此事州郡自行則可朝廷難為施行

宋史全文卷二十七上